

04-4 hlf  
T-2

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) na prijedlog ministra zdravstva i predsjednika Kriznog štaba Ministarstva zdravstva Zeničko-dobojskog kantona, Vlada Zeničko-dobojskog kantona, na 28. vanrednoj sjednici, održanoj dana 17.03.2021. godine, d o n o s i

## ZAKLJUČAK

### I.

Usvaja se Informacija o epidemiološkoj situaciji COVID-19 u Zeničko-dobojskom kantonu na dan 15.03.2021. godine, s prijedlogom Naredbi Kriznog štaba Ministarstva zdravstva.

### II.

Usvajaju se Naredbe Kriznog štaba Ministarstva zdravstva koje su sastavni dio ovog Zaključka (Prilog 1.).

### III.

Naredbe Kriznog štaba Ministarstva zdravstva donose se sa rokom važenja od 14 dana, računajući od dana 17.03.2021. godine, koji se utvrđuje kao dan početka primjene ovih Naredbi.

### IV.

Zadužuje se Krizni štab Ministarstva zdravstva da prije isteka roka iz tačke III. ovog zaključka, sagleda kompletnu epidemiološku situaciju COVID-19 u Zeničko-dobojskom kantonu i sačini procjenu rizika, a radi razmatranja mogućnosti i potrebe izmjene naredbi utvrđenih ovim Zaključkom, te prema Vladi Zeničko-dobojskog kantona dostavi prijedlog novih naredbi i preporuka.

### V.

Ovaj zaključak stupa na snagu danom donošenja i objavit će se u Službenim novinama Zeničko-dobojskog kantona.



**PREMIJER**  
po Odluci predsjedavajućeg Skupštine

*Mirnes Bašić*

Broj: 02-33-3607/21  
Datum, 17.03.2021. godine  
Zenica

#### DOSTAVLJENO:

- 1x Ministarstvo zdravstva,
- 1x Krizni štab Ministarstva zdravstva, putem Ministarstva,
- 1x svim zdravstvenim ustanovama na području Kantona, putem Ministarstva,
- 1x svim ministarstvima i drugim organima kantonalne uprave,
- 1x službena web stranica Zeničko-dobojskog kantona i Ministarstva zdravstva,
- 1x „Službene novine Zeničko-dobojskog kantona“,
- 1x a/a

**KRIZNI ŠTAB MINISTARSTVA ZDRAVSTVA  
ZENIČKO-DOBOJSKOG KANTONA**

**INFORMACIJA O EPIDEMIOLOŠKOJ SITUACIJI  
PO PITANJU COVID-19  
NA PODRUČJU ZDK**

U proteklih sedam dana (08.03.-14.03.2021.) prijavljeno je testiranje 1.527 osoba, od čega je PCR testirano 472 uzoraka, a brzim antigenskim testovima 1.055 uzoraka, od kojih su 844 pozitivna na SARS-CoV-2 (293 PCR potvrđeno, i 551 antigenski potvrđeno), što čini dnevni prosjek od 42 nova slučajeva potvrđenih PCR testom i 79 nova slučaja potvrđenih antigenskim testom.

Novi slučajevi registrirani su u svim općinama/gradovima na području ZDK.

Do sada je testirano ukupno 47.800 uzoraka, a SARS-CoV-2 je potvrđen kod ukupno 7.565 osoba.


Zaključno sa današnjim danom, u ZDK izliječeno je 6.480 pacijenata. Trenutno je aktivno 430 slučajeva pozitivnih na SARS-CoV-2 (potvrđeno PCR testiranjem).

Pregled osnovnih pokazatelja stanja Covid-19 infekcije na području ZDK sa 14.03.2021.:

Broj testiranih	47.800
Broj oboljelih	7.565
Broj aktivnih (PCR potvrđeni)	430
Broj aktivnih (Antigenski potvrđeni)	470
Broj aktivnih (UKUPNO)	900
Broj umrlih	630
Prosjek novih slučajeva	42
Stopa letaliteta	8,3%
Broj umrlih na 1000 st.	1,76

S današnjim danom, broj smrtnih ishoda na području ZDK je 630, što čini stopu letaliteta od 8,3%, odnosno 1,76 na 1000 stanovnika.

U proteklih sedam dana od posljedica Covid-19 umrlo je 50 osoba.




Primjetno je da trend broja umrlih od posljedica Covid-19 infekcije, nakon početnog povećanja od 04.03. do 11.03.2021. godine, pokazuje smanjenje broja umrlih (sedmodnevni prosjek), da bi nakon 11.03.2021. godine nastavio trend ubrzanog rasta.


Uporedni pregled osnovnih pokazatelja Covid-19 infekcije u FBiH I po kantonima:

Broj stanovnika (hiljada)	2.189	358	420	439	217	755
	FBIH	ZDK	KS	TK	HNK	Ostali kantoni
Broj testiranih	491.700	47.800	155.900	88.200	96.700	103.100
Broj oboljelih	95.060	7.565	35.300	14.200	18.860	19.135
Broj aktivnih	10.620	430	5.840	912	1.020	2.418
Broj umrlih	3.020	630	649	657	257	827
Prosijek novih slučajeva	798	42	439	76	112	129
Stopa letaliteta	3,2%	8,3%	1,8%	4,6%	1,4%	4,3%
Broj umrlih na 1000 st.	1,38	1,76	1,55	1,50	1,18	1,10
	FBIH	ZDK	KS	TK	HNK	Ostali kantoni
Broj testiranih na 1000 st	224,62	133,52	371,19	200,91	445,62	136,56
Broj oboljelih na 1000 st	43,43	21,13	84,05	32,35	86,91	25,34
Broj aktivnih na 1000 st	4,85	1,20	13,90	2,08	4,70	3,20
Broj umrlih na 1000 st	1,38	1,76	1,55	1,50	1,18	1,10
Prosijek novih slučajeva na 1000 st	0,36	0,12	1,05	0,17	0,52	0,17

Uočljivo je da ZDK među velikim kantonima ima najmanji broj oboljelih, ali i najmanji broj testiranih. S druge strane ima prilično visoku stopu letaliteta. 8,2% oboljenja je završilo smrtnim ishodom. Međutim kad se posmatra stopa smrtnosti (broj umrlih u odnosu na broj stanovnika), ona nije tako visoka (1,72 u odnosu na 1,36 u FBiH, 1,51 u Kantonu Sarajevo i 1,49 u Tuzlanskom kantonu).




Trend kretanja broja novooboljelih (sedmodnevni prosjek) pokazuje blagi, ali kontinuirani porast, za razliku od npr. Kantona Sarajevo, pa i nekim drugim kantonima, gdje je taj rast značajno ubrzan.



Uporedni pregled stope obolijevanja (ukupno oboljeli u odnosu na broj stanovnika dobne grupe) po dobnim grupama

Stopa obolijevanja	ZDK	FBIH
<10.	2,16	6,47
11-20.	5,09	17,29
21-30.	16,04	39,14
31-40.	22,67	56,02
41-50.	24,83	50,42
51-60.	25,31	48,95
61-70.	32,44	51,70
71-80.	41,50	49,36
>80.	51,56	79,61


Uporedni pregled stope obolijevanja (ukupno oboljeli u odnosu na broj stanovnika dobne grupe) po dobnim grupama



#### Zauzetost bolničkih kapaciteta

Pokazatelji zauzetosti bolničkih kapaciteta pokazuju trend povećanja hospitalizacije, kao i potrebe za respiratornom podrškom hospitaliziranih.

Trend određenih bolničkih pokazatelja (sedmodnevni prosjek)



Opterećenje bolničkih kapaciteta pokazuje kontinuirani porast. Posebno je uočeno da je u zadnje dvije sedmice značajno povećan udjel teških kliničkih stanja hospitaliziranih pacijenata.

#### Procjena potrebnih bolničkih kapaciteta

Broj potvrđenih aktivnih slučajeva	Struktura	Potrebna hospitalizacija	220	900	1.000	
Asimptomatski	40,00%		88	360	400	Ne zahtijeva nikakav tretman osim praćenja od strane HES-a
Blagi oblik	32,00%		70	288	320	Zahtijeva telefonsku konsultaciju tima PM
Srednje teški oblik bez riziko faktora	12,00%	2,40%	26	108	120	Zahtijeva telefonsko aktivno praćenje i/ili pregled tima PM, a 20% zahtijeva hospitalizaciju
Srednje teški oblik sa riziko faktorom	7,00%	5,60%	15	63	70	80% zahtijeva hospitalizaciju
Teški oblik	7,50%	7,50%	17	68	75	Zahtijeva hospitalizaciju sa oksigenacijom
Teški oblik sa komplikacijama	1,00%	1,00%	2	9	10	Zahtijeva ICU
Kritični oblik	0,50%	0,50%	1	5	5	Zahtijeva ICU
UKUPNO	100,00%	17,00%				
Broj pacijenata za ICU		1,50%				
Potreban broj Covid bolničkih postelja			37	153	170	
Potreban broj ICU postelja			3	14	15	

## IMUNIZACIJA

Tokom sedmice (08.-14. marta) započeto je vakcinisanje zdravstvenih radnika protiv Covid-19 vakcinom AstraZeneca. Zaprimito je 740 doza vakcine, a obzirom da je prijavljeno više od 2.100 zdravstvenih radnika za vakcinaciju, raspoloživi broj vakcina je opredijeljen za najugroženije. Vakcine su distribuirane i dvije bolnice i 12 domova zdravlja. Sve zdravstvene ustanove su provele vakcinaciju i potrošile sve dobijene količine vakcina, osim DZ Žepče koji je odbio primiti ovu vrstu vakcine.

Nisu zabilježene neželjene reakcije tokom vakcinacije.

Za narednu sedmicu je najavljena dostava još 740 doza vakcine (AstraZeneca), koje će biti distribuirane u sve zdravstvene ustanove na području ZDK

## ZAKLJUČAK

Epidemiološka situacija na području ZDK, sa aspekta Covid-19 infekcije se može ocijeniti nepovoljnom sa trendom pogoršanja, odnosno porasta broja novooboljelih, kao i smrtnih slučajeva. Posebno je situacija složena sa

aspekta opterećenja bolničkih kapaciteta, zbog povećanog broja teških kliničkih slika kod velikog broja hospitaliziranih.

Cijeneći epidemiološku situaciju Covid-19 na području ZDK, Krizni štab Ministarstva zdravstva ZDK je dana 16.03.2021. održao sjednicu na kojoj je usvojen prijedlog naredbi u cilju zaštite zdravlja stanovništva.

Sastavni dio ove Informacije je prijedlog naredbe (Prilog 1).

**NAREDBE KRIZNOG ŠTABA  
MINISTARSTVA ZDRAVSTVA ZENIČKO-DOBOJSKOG KANTONA**

**I. NAREDBE ZA ZDRAVSTVENE USTANOVE**

1. Naređuje se nadležnim doktorima zdravstvenih ustanova primarne zdravstvene zaštite da prije upućivanja COVID-19 pozitivnog pacijenta u JU Kantonalna bolnica Zenica i JU Opća bolnica Tešanj, obavezno kontaktiraju nadležnog infektologa JU Kantonalna bolnica Zenica, odnosno pulmologa JU Opća bolnica Tešanj.

Pacijeti iz općina/grada Zenica, Visoko, Kakanj, Breza, Zavidovići, Žepče i Vareš upućuju se u JU Kantonalna bolnica Zenica.

Pacijenti sa područja općina Tešanj, Maglaj, Usora i Doboj Jug upućuju se u JU Opća bolnica Tešanj.

2. Naređuje se zdravstvenim ustanovama primarne zdravstvene zaštite obavezno i kontinuirano provođenje i dokumentovanje procedure aktivnog praćenja pacijenata oboljelih od COVID-19.
3. Zadužuju se JU Kantonalna bolnica Zenica i JU Opća bolnica Tešanj da organizaciju rada specijalističko konsultativne zdravstvene zaštite na terenu, usklade sa epidemiološkom situacijom.

**II. NAREDBE ZA HIGIJENSKO-EPIDEMIOLOŠKE SLUŽBE DOMOVA ZDRAVLJA**

1. Nalaže se svim higijensko-epidemiološkim službama domova zdravlja na području Kantona (u daljem tekstu: HES), da svakog radnog dana do 12<sup>00</sup> sati, svim gradskim/općinskim sanitarnim inspektorima, obavezno putem službenog e-mail, izvrše prijavu zarazne bolesti COVID-19, u skladu sa članom 10. stav (2) Pravilnika o načinu prijavljivanja zaraznih bolesti ("Sl. novine FBiH", broj: 101/12).
2. Nalaže se HES JU Poliklinika sa dnevnom bolnicom Doboj Jug, da prijavu zarazne bolesti iz prethodne tačke ove Naredbe, obavezno putem službenog e-mail dostavi kantonalnoj sanitarnoj inspekciji.

**III. NAREDBE ZA NADLEŽNE INSPEKCIJSKE ORGANE**

1. Nalaže se Kantonalnoj upravi za inspeksijske poslove Zeničko-dobojskog kantona (u daljem tekstu: Kantonalna uprava za inspeksijske poslove) i gradskim/općinskim inspekcijama, da u skladu sa svojim nadležnostima pojačaju inspeksijski nadzor svih inspekcija, u cilju kontrole i provođenja naređenih mjera utvrđenih Naredbama Kriznog štaba Federalnog ministarstva zdravstva, koje je usvojila Vlada Federacije Bosne i Hercegovine, radi sprječavanja širenja COVID-19 na području Zeničko-dobojskog kantona.
2. Nalaže se Kantonalnoj upravi za inspeksijske poslove da izvrši inspeksijski nadzor u ustanovama koje zbrinjavaju i smještaju starije osobe, vezano za posjedovanje kriznog



plana u slučaju pojave zarazne bolesti COVID-19, osiguranja prostorija za izolaciju oboljelih korisnika ustanove i internog plana za posjeta u ustanovi.

3. Nalaže se nadležnim inspekcijama da Kriznom štabu Ministarstva zdravstva dostave izvještaje o pojačanom inspeksijskom nadzoru, u cilju kontrole provođenja naređenih mjera i sprječavanja širenja COVID-19, te da navedene izvještaje dostavljaju u kontinuitetu svakih 14 dana.
4. Nalaže se nadležnim inspekcijama da prijavu zarazne bolesti COVID-19 koju zaprime od nadležne HES, odmah po prijemu unesu u elektronsku bazu podataka Ministarstva unutrašnjih poslova Zeničko-dobojskog kantona, odnosno nadležne policijske uprave/policijske stanice.
5. Za lica kod kojih je utvrđena zarazna bolest COVID-19 po prijavi bolesti iz tačke 4. nadležni sanitarni inspektor obavezan je bez odlaganja donijeti rješenje o zabrani kretanja i izolaciji u kućnim uslovima za oboljele osobe i osobe iz kontakta, u skladu sa Zakonom o zaštiti stanovništva od zaraznih bolesti i Kantonalnim planom pripravnosti za oboljenja izazvana COVID-19.

#### **IV. NAREDBE ZA UPRAVU POLICIJE MINISTARSTVA UNUTRAŠNJIH POSLOVA ZENIČKO-DOBOJSKOG KANTONA**

1. Nalaže se Upravi policije, Ministarstva unutrašnjih poslova Zeničko-dobojskog kantona (u daljem tekstu: Uprava policije), da putem policijskih službenika, svakodnevno i kontinuirano vrši kontrolu lica koja su oboljela od zarazne bolesti COVID-19, u skladu sa podacima koji su uneseni u elektronsku bazu podataka Ministarstva unutrašnjih poslova.
2. Nalaže se Upravi policije da o svakom nepoštivanju izolacije u kućnim uvjetima, bez odlaganja obavijesti nadležne inspekcije i poduzme mjere u skladu sa Zakonom o krivičnom postupku, a u vezi sa članom 226. Krivičnog zakona FBiH.
3. Nalaže se Upravi policije da poduzme mjere iz svoje nadležnosti i da pruži potrebnu podršku inspeksijskim službama u toku vršenja inspeksijskog nadzora, a u cilju kontrole provođenja naređenih mjera i sprječavanja širenja COVID-19.

#### **V. NAREDBE ZA UGOSTITELJSKE OBJEKTE**

1. Nalaže se ugostiteljskim objektima striktno postupanje po Naredbama Kriznog štaba Federalnog ministarstva zdravstva, koje je usvojila Vlada Federacije Bosne i Hercegovine, uz obavezno pridržavanje higijensko-epidemioloških mjera donijetih od Zavoda za javno zdravstvo u Federaciji BiH.
2. Nalaže se ugostiteljskim objektima da stolove u ugostiteljskom objektu rasporede na način da se broj raspoloživih stolica za goste, odredi tako da za svaku stolicu pripada minimalno 2 m<sup>2</sup> površine prostora namijenjenog za prijem gostiju objekta.
3. Nalaže se ugostiteljskim objektima da na vidnom mjestu u objektu istaknu informaciju koja sadrži sljedeće podatke:
  - površina dijela objekta namijenjenog za smještaj gostiju,

- broj raspoloživih stolica za goste objekta.

4. Nalaže se ugostiteljskim objektima da zaduže osobu koja će osigurati provođenje mjera iz tačke V. podtačka 1. i 2. ove Naredbe.
5. Za provođenje mjera iz tačke V. podtačka 1. 2. 3. i 4. ove Naredbe, odgovorno je pravno lice, kao i odgovorna osoba u pravnom licu, te fizičko lice registrovano za obavljanje ugostiteljske djelatnosti.
6. Zadužuju se nadležne inspekcije da vrše pojačan inspekcijski nadzor provođenja naloženih mjera u ugostiteljskim objektima, svako u okviru svoje nadležnosti.
7. Zadužuju se nadležne inspekcije da protiv lica koja ne poduzimaju mjere u skladu sa ovom Naredbom, kao posebnim propisom u uvjetima proglašene epidemije u Federaciji BiH, privremeno zabrane rad ugostiteljskog objekta za koji se utvrdi da ne provodi mjere u skladu sa ovom Naredbom.

## **VI. NAREDBE ZA MINISTARSTVA I DRUGE ORGANE UPRAVE**

Nalaže se Ministarstvima i drugim organima uprave da postupaju po Naredbama Kriznog štaba Federalnog ministarstva zdravstva, koje je usvojila Vlada Federacije Bosne i Hercegovine, te da u okviru svoje nadležnosti daju upute za postupanje institucijama iz svoje nadležnosti.